

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

জাতীয় দৈনিকসমূহে প্রকাশিত সংবাদ, সম্পাদকীয়র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা ২৯/২০১৮-১৯

ঢাকা, বুধবার ৮ আগস্ট ২০১৮, ২৪ শ্রাবণ ১৪২৫

আজকের দৈনিক পত্রিকাগুলো নিম্নলিখিত বিষয় প্রাধান্য দিয়ে খবর ছেপেছে

- ১। রোহিঙ্গাদের ফেরত নিতে মিয়ানমারকে বোঝান
আন্তর্জাতিক সম্প্রদায়ের প্রতি প্রধানমন্ত্রী
- ২। নিরাপদ সড়ক নির্মাণে তিন প্রকল্পসহ একনেকে ১১ প্রকল্প অনুমোদন
- ৩। বঙ্গমাতা শেখ ফজিলাতুন নেছা মুজিবের জন্মদিন আজ
মহিলা ও শিশুবিষয়ক মন্ত্রণালয় আয়োজিত অনুষ্ঠানে যোগ দেবেন প্রধানমন্ত্রী
- ৪। আহত কর্মীদের দেখতে হাসপাতালে প্রধানমন্ত্রী
- ৫। আগামীতে বিশ্ব নেতৃত্বে আসবে তরুণ এমপিরা
জাতিসংঘ মহাসচিবের বিশেষ দূতের সঙ্গে সাক্ষাৎকালে স্পিকার
- ৬। রোহিঙ্গা প্রত্যাবাসনে বাংলাদেশ ও জাপান একসাথে কাজ করছে : উভয়দেশের পররাষ্ট্রমন্ত্রীর বৈঠক
- ৭। সঞ্চয়পত্রের সুদ কমছে না : অর্থমন্ত্রী
- ৮। প্রধানমন্ত্রীর নির্দেশে সরকার নিরাপদ সড়ক বাস্তবায়নের কাজ শুরু করেছে : স্বাস্থ্যমন্ত্রী
১৫ আগস্ট সরকারি হাসপাতালগুলোতে বিনামূল্যে চিকিৎসাসেবা
- ৯। সড়ক পরিবহনের নতুন আইন হাইকোর্টের রায়ের সঙ্গে সাংঘর্ষিক নয় : আইনমন্ত্রী
- ১০। শিক্ষার্থীদের ওপর হামলার অভিযোগ নিয়ে যুক্তরাষ্ট্র-জাতিসংঘের বিবৃতি অযাচিত, অনভিপ্রেত : তথ্যমন্ত্রী
সাংবাদিকদের ওপর হামলায় জড়িতদের আইনের আওতায় আনতে স্বরাষ্ট্রমন্ত্রীকে চিঠি
- ১১। জাদুঘর জীবন্ত করে অতীত, নির্ধারণ করে বর্তমান ও ভবিষ্যৎ
জাতীয় জাদুঘরের ১০৫তম প্রতিষ্ঠাবার্ষিকীতে সংস্কৃতিমন্ত্রী
- ১২। ঈদুল আজহায় বাসের অগ্রিম টিকিট বিক্রয় গতকাল থেকে শুরু, ট্রেনের টিকিট আজ থেকে

১। **রোহিঙ্গাদের ফেরত নিতে মিয়ানমারকে বোঝান
আন্তর্জাতিক সম্প্রদায়ের প্রতি প্রধানমন্ত্রী**

প্রধানমন্ত্রী শেখ হাসিনা রোহিঙ্গাদের বাংলাদেশ থেকে নিজ দেশে ফিরিয়ে নেওয়ার বিষয়ে মিয়ানমারকে রাজি করানোর জন্য জাপানসহ আন্তর্জাতিক সংস্থার প্রতি তাঁর আহ্বান পুনর্ব্যক্ত করেছেন। সফররত জাপানের পররাষ্ট্রমন্ত্রী তারো কোনো গতকাল (৭ আগস্ট মঙ্গলবার) প্রধানমন্ত্রী শেখ হাসিনার সঙ্গে তাঁর সরকারি বাসভবন গণভবনে সাক্ষাতে এলে প্রধানমন্ত্রী শেখ হাসিনা এ আহ্বান জানিয়ে বলেন, রোহিঙ্গাদের অবশ্যই তাদের দেশে ফিরিয়ে নিয়ে যেতে হবে। এজন্য মিয়ানমারকে তাদের নাগরিকদের দেশে ফিরিয়ে নেওয়ার জন্য বোঝাতে হবে। জাপানের পররাষ্ট্রমন্ত্রী বলেন, তিনি তাঁর সাম্প্রতিক মিয়ানমার সফরে দেশটির রাষ্ট্রপতি উইস মিন্ট এবং স্টেট কাউন্সিলর অং সান সুচি'র সঙ্গে রোহিঙ্গা সমস্যা নিয়ে আলোচনা করেছেন। সূত্র-ইত্তেফাক (পৃ.১,ক.৬), সংবাদ (শেষ পৃ.,ক.৪), এশিয়ান এজ (শেষ পৃ.,ক.১), ইন্ডিপেনডেন্ট (পৃ.২,ক.৬)।

২। **নিরাপদ সড়ক নির্মাণে তিন প্রকল্পসহ একনেকে ১১ প্রকল্প অনুমোদন**

দুর্ঘটনা হ্রাস ও নিরাপদ সড়ক অবকাঠামো নির্মাণের উদ্দেশ্যে তিনটি প্রকল্প, ডেসকো এলাকায় অনলাইন স্মার্ট প্রি-পেমেন্ট মিটার সরবরাহ ও স্থাপন শীর্ষক প্রকল্পসহ ৬ হাজার ৪৪৮ কোটি ১৪ লাখ টাকা ব্যয়ে ১১টি উন্নয়ন প্রকল্পের অনুমোদন দিয়েছে জাতীয় অর্থনৈতিক পরিষদের নির্বাহী কমিটি (একনেক)। এর মধ্যে সরকারি তহবিল থেকে ৬ হাজার ৪১৬ কোটি ১৬ লাখ টাকা এবং বাস্তবায়নকারী সংস্থা থেকে ৭ কোটি ৯৮ লাখ টাকা খরচ করা হবে। গতকাল (৭ আগস্ট মঙ্গলবার) রাজধানীর শেরেবাংলা নগরে এনইসি সম্মেলনক্ষেত্র প্রধানমন্ত্রী শেখ হাসিনার সভাপতিত্বে অনুষ্ঠিত সভায় এ প্রকল্পগুলোর অনুমোদন দেওয়া হয়। সূত্র-সংবাদ (শেষ পৃ.,ক.৪), ইত্তেফাক (শেষ পৃ.,ক.৫), এশিয়ান এজ (পৃ.১১,ক.১), ইন্ডিপেনডেন্ট (পৃ.৯,ক.১)।

৩। **বঙ্গমাতা শেখ ফজিলাতুন নেছা মুজিবের জন্মদিন আজ**

মহিলা ও শিশুবিষয়ক মন্ত্রণালয় আয়োজিত অনুষ্ঠানে যোগ দেবেন প্রধানমন্ত্রী

জাতির পিতা বঙ্গবন্ধু শেখ মুজিবুর রহমানের সহধর্মিণী, বঙ্গমাতা শেখ ফজিলাতুন নেছা মুজিবের ৮৮তম জন্মবার্ষিকী আজ (৮ আগস্ট সোমবার)। ১৯৩০ সালের এ দিনে গোপালগঞ্জের টুঙ্গিপাড়ায় সম্ভ্রান্ত শেখ পরিবারে তাঁর জন্ম। বেগম ফজিলাতুন নেছা মুজিব বাংলাদেশের স্বাধীনতা সংগ্রামের বিভিন্ন অধ্যায়ে গুরুত্বপূর্ণ ভূমিকা পালন করেছেন। অনেক জটিল ও সংকটময় পরিস্থিতিতে বঙ্গবন্ধুর পাশে থেকে তাঁকে পরামর্শ প্রদান ও সঠিক সিদ্ধান্ত নিতে সহযোগিতা করেছেন তিনি। ১৯৭৫ সালের ১৫ আগস্টের কালরাতে বঙ্গবন্ধু এবং পরিবারের অন্য সদস্যদের সঙ্গে ঘাতকের বুলেটে শহিদ হন তিনি। দিবসটি উপলক্ষে রাষ্ট্রপতি মোঃ আবদুল হামিদ ও প্রধানমন্ত্রী শেখ হাসিনা পৃথক বাণী দিয়েছেন। বিভিন্ন দল ও সংগঠন দিনটি উপলক্ষে বিস্তারিত কর্মসূচি হাতে নিয়েছে। দিনটি উপলক্ষে মহিলা ও শিশুবিষয়ক মন্ত্রণালয় আজ সকাল ১০টায় রাজধানীর বঙ্গবন্ধু আন্তর্জাতিক সম্মেলনক্ষেত্রে এক অনুষ্ঠানের আয়োজন করেছে। প্রধানমন্ত্রী শেখ হাসিনা এতে প্রধান অতিথি হিসেবে যোগ দেবেন। সূত্র-সমকাল (পৃ.২,ক.১), জনকণ্ঠ (পৃ.১,ক.৮), এশিয়ান এজ (শেষ পৃ.,ক.৭), ইন্ডিপেনডেন্ট (পৃ.২,ক.১)।

৪। **আহত কর্মীদের দেখতে হাসপাতালে প্রধানমন্ত্রী**

নিরাপদ সড়কের দাবিতে শিক্ষার্থীদের আন্দোলনে ধানমণ্ডিতে আওয়ামী লীগ কার্যালয়ে দুর্বৃত্তদের হামলায় আহত দলীয় কর্মীদের দেখতে হাসপাতালে গেছেন প্রধানমন্ত্রী শেখ হাসিনা। গতকাল (৭ আগস্ট মঙ্গলবার) রাজধানীর শেরেবাংলা নগরে জাতীয় চক্ষুবিজ্ঞান ইনস্টিটিউট ও হাসপাতালে আহতদের দেখতে যান প্রধানমন্ত্রী। উন্নত চিকিৎসার জন্য গুরুতর আহতদের প্রয়োজনে বিদেশে পাঠানোর নির্দেশ দেন তিনি। সূত্র-সমকাল (পৃ.২,ক.৮), জনকণ্ঠ (পৃ.১,ক.৮), নিউ এজ (পৃ.২,ক.১), ইন্ডিপেনডেন্ট (পৃ.১৫,ক.১)।

৫। **আগামীতে বিশ্ব নেতৃত্বে আসবে তরুণ এমপিরা**

জাতিসংঘ মহাসচিবের বিশেষ দূতের সঙ্গে সাক্ষাৎকালে স্পিকার

তরুণ এমপিরাই আগামীতে বিশ্বে নেতৃত্ব দেবে। মানবিক ও বৈষম্যমুক্ত বিশ্ব প্রতিষ্ঠায় তরুণ সংসদ সদস্যদের ভূমিকা হবে খুবই গুরুত্বপূর্ণ বলে মন্তব্য করেছেন স্পিকার ড. শিরীন শারমিন চৌধুরী। তিনি বর্তমানে বাংলাদেশের রাজনীতিতে তরুণদের অংশগ্রহণ খুবই আশাব্যঞ্জক বলে উল্লেখ করেন। গতকাল (৭ আগস্ট মঙ্গলবার) জাতীয় সংসদ

ভবনে স্পিকারের সঙ্গে ইউএন সেক্রেটারি জেনারেলের স্পেশাল এনভয় অন ইয়ুথ জয়াথমা বিক্রমানায়েকে সাক্ষাৎ করলে এ কথা বলেন তিনি। জয়াথমা বিক্রমানায়েকে বলেন, জাতিসংঘ তরুণ নেতৃত্বকে সঙ্গে নিয়ে কাজ করতে আগ্রহী। এ সময় তিনি তরুণ পার্লামেন্টারিয়ানদের দক্ষতা বাড়ানো ও অভিজ্ঞতা বিনিময়ের ওপর গুরুত্বারোপ করেন। সূত্র-ভোরের কাগজ (পৃ.১১,ক.১), আমাদের অর্থনীতি (শেষ পৃ.,ক.৫)।

৬। **রোহিঙ্গা প্রত্যাবাসনে বাংলাদেশ ও জাপান একসাথে কাজ করছে : উভয়দেশের পররাষ্ট্রমন্ত্রীর বৈঠক**

নিরাপদে, স্বেচ্ছায় ও দ্রুততম সময়ে মিয়ানমারের রোহিঙ্গাদের ফেরাতে তথা এ সংকটের টেকসই সমাধানে বাংলাদেশ ও জাপান সুনির্দিষ্ট প্রস্তাব নিয়ে কাজ করছে। সফররত জাপানের পররাষ্ট্রমন্ত্রী তারো কোনো ও পররাষ্ট্রমন্ত্রী এ এইচ মাহমুদ আলী গতকাল (৭ আগস্ট মঙ্গলবার) রাষ্ট্রীয় অতিথি ভবন পদ্মায় দ্বিপাক্ষিক বৈঠকশেষে সাংবাদিকদের এ কথা বলেন। বৈঠকে জাপানি মন্ত্রী বাংলাদেশে কর্মরত জাপানিদের নিরাপত্তা ও বিনিয়োগকারী ব্যবসায়ী, বিশেষজ্ঞদের জন্য উপযুক্ত কর্মপরিবেশ নিশ্চিত করার আহ্বান জানান। সূত্র-ইত্তেফাক (পৃ.১৫,ক.৫), যুগান্তর (পৃ.২,ক.৬), এশিয়ান এজ (পৃ.১,ক.৬), ইন্ডিপেনডেন্ট (শেষ পৃ.,ক.১)।

৭। **সঞ্চয়পত্রের সুদ কমছে না : অর্থমন্ত্রী**

আগামী জাতীয় সংসদ নির্বাচনের আগে সঞ্চয়পত্রের সুদের হার কমছে না। গতকাল (৭ আগস্ট মঙ্গলবার) এ বিষয়ে সিদ্ধান্ত নিতে সচিবালয়ে কেন্দ্রীয় ব্যাংক ও অভ্যন্তরীণ সম্পদ বিভাগের প্রতিনিধিদের সঙ্গে অর্থমন্ত্রী আবুল মাল আবদুল মুহিত বৈঠক করেন। এতে সঞ্চয়পত্রের সুদের হার নির্ধারণে উভয় প্রতিষ্ঠানকে আগামী দুই মাসের মধ্যে প্রতিবেদন দিতে বলা হয়েছে। এ সময় আগামী জানুয়ারি থেকে সঞ্চয়পত্র বিক্রির ক্ষেত্রে অটোমেশন সিস্টেম চালু করা হবে বলেও জানান অর্থমন্ত্রী। সূত্র-ইত্তেফাক (পৃ.১৯,ক.৪), যুগান্তর (শেষ পৃ.,ক.৬), এশিয়ান এজ (পৃ.১,ক.৪), নিউ নেশন (শেষ পৃ.,ক.৬)।

৮। **প্রধানমন্ত্রীর নির্দেশে সরকার নিরাপদ সড়ক বাস্তবায়নের কাজ শুরু করেছে : স্বাস্থ্যমন্ত্রী**

১৫ আগস্ট সরকারি হাসপাতালগুলোতে বিনামূল্যে চিকিৎসাসেবা

স্বাস্থ্য ও পরিবারকল্যাণ মন্ত্রী মোহাম্মদ নাসিম বলেছেন, প্রধানমন্ত্রী শেখ হাসিনা শিক্ষার্থীদের নিরাপদ সড়ক চাই আন্দোলনের সকল যৌক্তিক দাবি মেনে নিয়েছেন। তাঁর নির্দেশে সরকার দাবিগুলো বাস্তবায়নের কাজ শুরু করেছে। প্রধানমন্ত্রীর আহ্বানে স্কুল কলেজের শিক্ষার্থীরা ক্লাসে ফিরে গিয়ে পড়াশোনা শুরু করায় মন্ত্রী শিক্ষিকশোরদের প্রতি কৃতজ্ঞতা জানান। গতকাল (৭ আগস্ট মঙ্গলবার) রাজধানীর আজিজ কো-অপারেটিভ মার্কেটে রাজনৈতিক গবেষক ও লেখক সুভাষ সিংহ রায় রচিত 'রবীন্দ্রনাথ ঠাকুরের চিকিৎসা-ভাবনা' গ্রন্থের মোড়ক উন্মোচন অনুষ্ঠানে প্রধান অতিথির বক্তৃতায় তিনি এসব কথা বলেন। এদিকে স্বাস্থ্যমন্ত্রী মোহাম্মদ নাসিমের নির্দেশে জাতীয় শোকদিবস উপলক্ষে ১৫ আগস্ট কমিউনিটি ক্লিনিকসহ দেশের সব সরকারি হাসপাতালে সকাল ৯টা থেকে দুপুর ১২টা পর্যন্ত বহির্বিভাগে বিনামূল্যে চিকিৎসাসেবা ও রোগ নির্ণয় পরীক্ষা করা হবে। ঐদিন সকল সরকারি হাসপাতালের জরুরি বিভাগ ও অভ্যন্তরীণ বিভাগে ২৪ ঘণ্টা বিনামূল্যে চিকিৎসাসেবা প্রদান করার নির্দেশ দেন মন্ত্রী। সূত্র-ইত্তেফাক (শেষ পৃ.,ক.৪), যুগান্তর (পৃ.২,ক.৮)।

৯। **সড়ক পরিবহনের নতুন আইন হাইকোর্টের রায়ের সঙ্গে সাংঘর্ষিক নয় : আইনমন্ত্রী**

সড়ক পরিবহণ আইনের নতুন খসড়া হাইকোর্টের রায়ের সঙ্গে 'সাংঘর্ষিক' নয় বলে মন্তব্য করেছেন আইনমন্ত্রী আনিসুল হক। সড়ক পরিবহণ ক্ষেত্রে শৃঙ্খলা ফিরিয়ে আনা, অব্যবস্থাপনা দূরীকরণ ও সড়ক যেন চলাচলের জন্য নিরাপদ হতে পারে, সেজন্য এ আইন করা হয়েছে। আইনমন্ত্রী গতকাল (৭ আগস্ট মঙ্গলবার) সুপ্রিমকোর্ট বার মিলনায়তনে বাংলাদেশ আইন সমিতি আয়োজিত এক অনুষ্ঠানশেষে সাংবাদিকদের প্রশ্নের জবাবে এসব কথা বলেন। সূত্র-সমকাল (পৃ.১৯,ক.৫), ইত্তেফাক (পৃ.১৯,ক.৮)।

১০। **শিক্ষার্থীদের ওপর হামলার অভিযোগ নিয়ে যুক্তরাষ্ট্র-জাতিসংঘের বিবৃতি অযাচিত অনভিপ্রেত : তথ্যমন্ত্রী**

সাংবাদিকদের ওপর হামলায় জড়িতদের আইনের আওতায় আনতে স্বরাষ্ট্রমন্ত্রীকে চিঠি

তথ্যমন্ত্রী হাসানুল হক ইনু বলেছেন, নিরাপদ সড়কের দাবিতে আন্দোলনরত শিক্ষার্থীদের ওপর হামলার অভিযোগ নিয়ে জাতিসংঘ ও যুক্তরাষ্ট্রের দূতাবাসের বিবৃতি অনভিপ্রেত ও অযাচিত। একইসঙ্গে এসব বিবৃতি প্রত্যাহার করার অনুরোধ জানিয়েছেন তিনি। গতকাল (৭ আগস্ট মঙ্গলবার) সচিবালয়ের নিজ দপ্তরে এক প্রেস ব্রিফিংয়ে তথ্যমন্ত্রী এসব কথা বলেন।

নিরাপদ সড়কের দাবিতে আন্দোলনের সময় সাংবাদিকদের ওপর হামলাকারীদের দ্রুত আইনের আওতায় আনতে স্বরাষ্ট্রমন্ত্রী আসাদুজ্জামান খান কামালকে চিঠি পাঠিয়েছেন তথ্যমন্ত্রী হাসানুল হক ইনু। এ চিঠিতে সাংবাদিকদের ওপর হামলাকারীদের চিহ্নিত করা এবং তাদের বিরুদ্ধে কঠোর ব্যবস্থা নিতে অনুরোধ জানান তথ্যমন্ত্রী। গতকাল (৭ আগস্ট মঙ্গলবার) তথ্যমন্ত্রীর এ চিঠি স্বরাষ্ট্রমন্ত্রীর দপ্তরে পাঠানো হয়েছে। সূত্র-সমকাল (শেষ পৃ.,ক.৪),(পৃ.২,ক.৫), **ইত্তেফাক** (পৃ.১,ক.১), **ইন্ডিপেনডেন্ট** (পৃ.১,ক.৪), **এশিয়ান এজ** (শেষ পৃ.,ক.৫)।

১১। **জাদুঘর জীবন্ত করে অতীত, নির্ধারণ করে বর্তমান ও ভবিষ্যৎ**

জাতীয় জাদুঘরের ১০৫তম প্রতিষ্ঠাবার্ষিকীতে সংস্কৃতিমন্ত্রী

সংস্কৃতিমন্ত্রী আসাদুজ্জামান নূর বলেছেন, বর্তমানে জাদুঘরকে বলা হয় লিভিং মিউজিয়াম বা জীবন্ত জাদুঘর। যেখানে দাঁড়িয়ে আমরা শুধু অতীত নয়, বর্তমান এবং ভবিষ্যৎ নির্ধারণ করতে পারি। গতকাল (৭ আগস্ট মঙ্গলবার) জাতীয় জাদুঘরের ১০৫তম প্রতিষ্ঠাবার্ষিকী উপলক্ষে অনুষ্ঠিত এক সেমিনারে প্রধান অতিথির বক্তৃতায় তিনি এ কথা বলেন। জাতীয় জাদুঘরের উদ্যোগে সেমিনারটি জাদুঘরের মূল মিলনায়তনে অনুষ্ঠিত হয়। তিনি বলেন, বর্তমান প্রধানমন্ত্রী শেখ হাসিনার জাতীয় জাদুঘরের প্রতি বিশেষ আকর্ষণ রয়েছে। তিনি চান ঢাকার এ এলাকাটিকে নতুনভাবে সাজাতে। জাদুঘর ও পাবলিক লাইব্রেরিকে নতুন কাঠামো দিয়ে তিনি এটিকে পরিণত করতে চান দক্ষিণ এশিয়ার শ্রেষ্ঠ জাদুঘরে। সূত্র-সংবাদ (শেষ পৃ.,ক.৭), যুগান্তর (পৃ.১৮,ক.৬), প্রথম আলো (পৃ.৫,ক.১)।

১২। **ঈদুল আজহায় বাসের অগ্রিম টিকিট বিক্রয় গতকাল থেকে শুরু, ট্রেনের টিকিট আজ থেকে**

ঈদুল আজহা উপলক্ষে সারাদেশের আন্তঃনগর ট্রেনের অগ্রিম টিকিট বিক্রয় শুরু হচ্ছে আজ (৮ আগস্ট বুধবার) থেকে। এদিকে দেশের দক্ষিণ ও পশ্চিমাঞ্চলের প্রায় ৬০ রুটের বাসের অগ্রিম টিকিট বিক্রয় শুরু হয়েছে গতকাল (৭ আগস্ট মঙ্গলবার)। সূত্র-সংবাদ (পৃ.১,ক.৭), বণিক বার্তা (পৃ.২,ক.৫), **এশিয়ান এজ** (পৃ.৩,ক.১), **নিউ নেশন** (শেষ পৃ.,ক.৮)।

সম্পাদকীয়

- ক. **ইত্তেফাক** : সিরাজগঞ্জ সদর উপজেলার কয়েকটি ইউনিয়নের অর্ধশত গ্রামে গত দুই দশক ধরে জনবসতির টিন বা খড়ের চাল ছুঁয়ে বর্ষণসিক্ত বাঁশের মাথায়, গাছের ডালে বিদ্যুতের বিপজ্জনক সংযোগ দেওয়ায় উদ্বেগ প্রকাশ করে এ ব্যাপারে যথাযথ নিরাপত্তামূলক ব্যবস্থা নেওয়ার সুপারিশ।
- খ. **সমকাল** : আসন্ন ঈদুল আজহা উপলক্ষে ঢাকা উত্তর ও দক্ষিণ সিটি করপোরেশন যে ১৯টি অস্থায়ী পুস্তর হাট ইজারা দিয়েছে, তার মধ্যে ১৫টি খেলার মাঠ বা সড়কে উল্লেখ করে জনদুর্ভোগের বিষয়টি মাথায় রেখে কার্যকর পদক্ষেপ নেওয়ার সুপারিশ।
- গ. **যায়যায়দিন, যুগান্তর, সংবাদ, ভোরের কাগজ, নিউ এজ, ডেইলি স্টার, অবজারভার, নিউ নেশন** : মন্ত্রিসভায় সড়ক পরিবহণ আইন-২০১৮ এর খসড়া অনুমোদন হওয়ার কথা উল্লেখ করে সড়কপথে সুষ্ঠু ব্যবস্থাপনা নিশ্চিত করতে এবং দুর্ঘটনারোধে আইন প্রণয়নের পাশাপাশি আইনের সুষ্ঠু প্রয়োগ নিশ্চিত করার ওপর গুরুত্বারোপ।
- ঘ. **বণিক বার্তা** : এখনো ৩৩ শতাংশ যক্ষ্মা রোগী শনাক্তের বাইরে থাকায় রোগীদের কাছ থেকে যক্ষ্মার জীবাণু ছড়াতে পারে। যক্ষ্মার ব্যাপারে সচেতনতা সৃষ্টির আহ্বান।
- ঙ. **এশিয়ান এজ** : মার্কিন রাষ্ট্রদূতের গাড়িতে হামলা হওয়ায় তা দেশের ভাবমূর্ত্তি ক্ষুণ্ণ করেছে উল্লেখ করে দেশে বিদেশীদের যথাযথ নিরাপত্তার ব্যবস্থা করার সুপারিশ।
- চ. **ইন্ডিপেনডেন্ট** : কৃষিজমির আগাছা ফসল উৎপাদনে ক্ষতিকর প্রভাব ফেলায় এসব আগাছা নির্মূলে কৃষকদের স্বার্থে ভেষজ উপাদান ব্যবহারের ওপর গুরুত্বারোপ।

উপসম্পাদকীয়

বণিক বার্তা পত্রিকায় প্রকাশিত কলামে উল্লেখ করা হয়েছে, বিশ্বের সঙ্গে তাল মিলিয়ে দেশের শ্রমের দক্ষতার আন্তর্জাতিকীকরণ ঘটাতে হবে এবং প্রযুক্তির বহুমুখীতা বাড়াতে হবে।

নিবন্ধ ও ফিচার

যায়যায়দিন পত্রিকায় প্রকাশিত 'বিশ্বব্যাপী স্বীকৃত বাংলাদেশ এগিয়ে যাচ্ছে' শিরোনামের নিবন্ধে অভিমত প্রকাশ করা হয়েছে, মধ্যম আয়ের দেশ হিসেবে নিজেদের অবস্থান ঠিক রাখতে হলে দেশের সব জনগোষ্ঠীর সম্মিলিত প্রচেষ্টা অব্যাহত রাখতে হবে।

#

ফাহিমা/মরজিনা/সাদ্দা/রশীদ/মাসুম/২০১৮/৯.০০ঘন্টা